

Explicaziuns tar il rapport da furmaziun

La Lescha federala davart la furmaziun professiunala prescriva en l'art. 20 che las persunas responsablas dals manaschis d'emprendissadi stoppian s'engaschar per il success il meglier pussaivel per las emprendistas e per ils emprendists e ch'ellas stoppian controllar quel periodicamain. En l'Ordinaziun davart la furmaziun fundamentala professiunala, part 7, èsi fixà che la fumatura u ch'il fumatur da la professiun constateschia il stadi da furmaziun da l'emprendista u da l'emprendist ed al discutia cun ella u cun el almain ina giada per semester. L'instrument per quai è il rapport da furmaziun. Il rapport da furmaziun è pia in'obligazion. I stuess dentant s'encleger da sasez che tut las fumaturas u che tut ils fumatars da la professiun tractian il stadi da la scolaziun cun l'emprendista u cun l'emprendist er ordaifer il rapport da furmaziun.

Documentaziun d'emprendre

Ina basa impurtanta per far il rapport da furmaziun è la documentaziun d'emprendre. La documentaziun d'emprendre vegn manada sistematicamain e serva sco ovra da consultaziun. Cun la documentaziun d'emprendre na survegnan las fumaturas u ils fumatars da la professiun betg mo ina survista da l'andament da la furmaziun ch'è succedì effectivamain. Ellas ed els pon er deducir da tala l'interess vi da la professiun u l'engaschament personal da l'emprendista u da l'emprendist. En differentas professiuns dastga la documentaziun d'emprendre vegnir duvrada per la part pratica da l'examen final; ella serva pia er sco basa per la procedura da qualificaziun. L'Ordinaziun da furmaziun cuntegna ils renviaments correspondents.

Furma dal rapport da furmaziun

I dat differentas furmas dal rapport da furmaziun. El po sa basar sin in attestat da lavur u sin formulars che vegnan duvrads per ils discurs da qualificaziun d'ina collavuratura u d'in collavuratur. Singulas organisaziuns dal mund professiunal mettan a disposizun rapports da valitaziun specifics per la professiun. Il formular «Rapport da furmaziun» qua avant maun è vegni cumplì sin basa dals basegns da la scolaziun entaifer il manaschi. Tar il SDBB po vegnir retratg il formular neutral areguard la professiun «Rapport da furmaziun». I sa tracta d'in instrument ch'è vegni concepi sin basa dals basegns specifics da la scolaziun entaifer il manaschi e che po vegnir surpiglià da las fumaturas e dals fumatars da la professiun (cf. www.lv.berufsbildung.ch). Cun quest instrument vegni empruvà dad unir sin in questiunari il cumpertament personal, il cumpertament da lavurar e las abilitads professiunals.

Procedura dal discurs resp. composiziun dal rapport da furmaziun

Cun il formular «Rapport da furmaziun» dal SDBB vegn proponida la suandanta procedura dal discurs:

1. – 4. Cumpetenzas

I vegn constatà il stadi da furmaziun. Giuditgads vegnan aspects professiunals e metodics, ma er il cumpertament en la grappa e la persuna sezza. Las cumpetenzas ch'en necessarias per emprendre las singulas professiuns vegnan enumeradas en la part 2 da l'Ordinaziun davart la furmaziun fundamentala professiunala. Sche las pretensiuns vegnan apaina ademplidas u sch'ellas vegnan ademplidas en moda insuffizienta, èsi impurtant da retschertgar activamain ils motivs e d'introducir mesiras per meglierar la situaziun.

Cumpetenza d'agir	
Cumpetenza professiunala	Cumpetenza sociala
- stadi da furmaziun - qualitat da la lavur - quantitat da lavur/tempo da lavurar - applicaziun da las enconuschienschas da la professiun	- abilitad da lavurar en in team, abilitad da schliar conflicts - collavuraziun - infurmaziun e communicaziun - agir tenor ils basegns da la clientella
Cumpetenza da metodos	Cumpetenza persunala
- tecnica da lavurar - pensar ed agir cumbinatoric - tractament da meds e d'indrizs da manaschi - strategia d'emprendre e da lavurar	- independenza, agir en atgna responsablidad - fidaivladad, abilitad da supportar squitsch - demananza - motivaziun

5. Documentaziun d'emprender

Il discurs è ina pussaivladad fitg buna per commentar e per giuditgar la documentaziun d'emprender.

6. Prestaziuns en scolas professiunalas ed en curs intermanaschials

Per regla vegnan tractads cun questa chaschun er l'attestat da las scolas professiunalas e las prestaziuns en ils curs intermanaschials.

7. Giudicament da la scolaziun tras l'emprendista u tras l'emprendist

Tar il rapport da furmaziun sa tracti d'ina communicaziun duala. Pervi da quai sto l'emprendista u l'emprendist survegnir la pussaivladad da pudair formular sias experientschas e sias opiniuns. Ella u el po giuditgar il manaschi e la furmatura u il furmatur da la professiun tenor las medemas cumpetenças, tenor las qualas ella u el è vegnì giuditgà sez e po exprimer sia opiniun davart la scolaziun.

8. – 9. Finamiras

La fin da la discussiun cuminaivla vegnan fixadas las finamiras che duain vegnir cuntanschidas en la proxima perioda da scolaziun u durant il rest da la scolaziun. Uschia pon elllas vegnir examinadas a chaschun da la proxima discussiun dal rapport da furmaziun.

10. – 12. Obligaziun

L'intent central dal rapport da furmaziun è da stgaffir clerezza ed evidenza. Il discurs è ina fermada intermediara e serva a determinar la posiziun. Cun ses agid duessan problems vegnir scuvrids e vias da soluziun duessan vegnir discutadas. Quai gida las partenarias u ils partenaris da discussiun a survegnir clerezza, uschia che tut las persunas san tge ch'i sto vegnir fatg e tge che l'autra vart spetga. Las suittascripziuns a la fin suittastrtgan il caracter liant dal rapport da furmaziun.

Renviaments per manar ils discurs

Il rapport da furmaziun cumplettescha las discussiuns pli curtas e pli lungas che vegnan tuttina fatgas avant, durant ed a la fin da singulas lavurs. Il discurs, per il qual il rapport da furmaziun è la basa, na duai betg succeder en moda spontana, mabain bain preparada e structurada.

Igl è sa cumprovà da metter a disposiziun il formular ordavant er a l'emprendista u a l'emprendist. En il senn d'in giudicament persunal po ella u el reflectar en moda critica l'agen far ed ha la pussaivladad da cumpareglier sia observaziun cun in giudicament d'ina experta u d'in expert. Questa preparaziun è ina bona basa per il discurs, perquai ch'i vegnan sclerids ordavant en questa moda la premissa ed ils cuntegns. Uschia resguarda il discurs tant il giudicament persunal sco er il giudicament tras terzas persunas.

I n'è betg simpel da manar in tal discurs – spezialmain sch'i sa tracta da tematisar fatgs difficils – perquai che quai na tutga per regla betg tar las abilitads che vegnan pretendidas da glieud da professiun. En quest regard porschan ils uffizis chantunals da la furmaziun professiunala lur sustegn, er en furma da curs spezials. Er en il discurs davart il rapport da furmaziun pon dentant glieud da professiun sa fidar da princip da lur savida e da lur capacitads concernent la professiun. Formulars sco quel dal SDBB èn in levgiament da lavur. Ma attenziun: Mintga questiunari surmaina da giuditgar ina persuna u ina chaussa en moda formalistica. Pervi da quai èsi en tscherts cas necessari d'integrar ulteriurs criteris. Formulars èn mo meds auxiliars e naginas schablonas, a las qualas ils umans ston correspunder.

Cun preparar il discurs stuessan las furmaturas ed ils furmatars da la professiun er sa metter en la posiziun da las persunas giuditgadas. Ellas u els confrunteschan las emprendistas u ils emprendists cun lur percepziun e cun lur aspectativas. Las emprendistas u ils emprendists survegnan bain laud per lur prestaziuns e per lur cumportament, ston dentant er acceptar e vegnir a frida cun critica. En il discurs vegnan tschertgads ils motivs d'eventuals problems e pussaivladads per als surmuntar. Il proceder è da gener collegial. La «valur per propi» d'ina persuna na stat betg en discussiun en quest connex, mabain sias prestaziuns, sias abilitads e ses cumportament che sa refereschon a la professiun sco er la concepziun da la furmaziun fundamentala professiunala. In giudicament regular che sa basa sin observaziuns conscientiusas stgaffescha transparenza ed avertedad e serva a tut las parts pertutgadas.